

EKAITZA. Joan den astean egin zuen elurraren urtzearen eta azken egunetan egindako euri erauntsien ondorioz, atzo egoera larria sortu zen Euskal Herriko hainbat tokitan, batez ere Iruñerrian eta Gasteiz aldean. Bi hirietan uholdeak gertatu ziren.

Elurraren urtzeak eta euri erauntsiek uholdeak eragin dituzte hainbat tokitan

Iruñerrian eta Gasteiz aldean zen bereziki larria egoera atzo arratsaldean, eta larrialdi planak indarrean ziren

Erredakzioa | DONOSTIA-BAIONA

Joan den astean botatako elurtearen urtzeak eta azken egunetan egin duen euriak egoera larria eragin zuen atzo Euskal Herriko toki askotan. Bereziki, Iruñerrian eta Gasteizko ordokian zen egoera larria atzo. Bi hiruburuetan uholdeak izan ziren, eta gauean administrazioek osatutako larrialdi zerbitzuak abian ziren, uholde arriskuari aurre egiteko.

Iruñean eguerdian hiriburuko hiru ibaiak gainezka egin zuen: Elorz, Sadar eta Arga. Elorz eta Sadarren, uretara eroritako hainbat zuhaitz bildu ostean, egoera hobetu egin zen, baina Argak uholdeak eragiten segitu zuen atzo egun osoan, eta kale asko ixten. Atzo arratsaldean kalteetarik segitzen zuten Magdalena auzoa, Runa parkea, Arantzadiko hiribidea eta Zizur Nagusia eta Nafarroako Unibertsitatea lotzen dituen kalea.

Nafarroan aurreko astean bota zuen elurraren urtzeari gehitu zitzaion atzo egun osoan bota zuen euri mardula. Zenbait tokitan, Bidasoan eta Baztanaldean, metro koadroko 50 litro-tik gora bildu zituzten atzo. Horrela, Bidasoa ibaiak gainezka egin zuen Igantzi inguruan, eta N-121 errepidea moztu behar izan zuten.

Egoera larriaren ondorioz, Nafarroako Gobernuak uholdeen gaineko larrialdi plana jarri zuen martxan, eta bilerak egin zituzten goiz eta arratsaldean.

Atzo arratsaldean Nafarroako ibai gehienetan larria zen egoera. Eta Ebro ibairaino ere iritsi zen alarma egoera. Izan ere, Castejon parean 5,42 metroko altuera zeraman Ebrok

eguerdian. Alarma egoera 5,50 metroko heina gainditzea pizten dute.

Uribarri-Ganboa eta Urrunaga urtegiak, gainezka

Gasteiz inguruan «egoera guztiz larria» zen atzo arratsaldean, Eusko Jaurlaritzako Ingurumen Sailak adierazi zuenez. Trespone eta Biloda herriak inkomunikatuta geratu ziren, uholdeen ondorioz, eta Zadorra ibaia gainezka egina zen kilometro askotan zehar.

Izan ere, Uribarri-Ganboa urtegiak ezin zuen ur gehiago hartu bere barne, eta ura askatzeari ekin zioten atzo goizetik. Arratsaldean, baina, askatzearen erritmoa azkartu behar izan zuten, eta horrek inguruko bazterretan egoera larriagotu zuen. Astegietako Eroskiko merkataria zentroa jendez hustu behar izan zuten, eta baita Durana-

ko ikastola ere. Gasteiz kanpoaldeko industri gunetan uholdeak kalteak eragin zituzten, esaterako, Betoño, Gamarra eta Astegietan. Gainera, gauaren hasieran, hiriburuko hainbat egoitz eta lokal kaltetzen hasi zen ura.


Gipuzkoan eta Bizkaian ibai asko gainezka egitearizan ziren egun osoan, baina neurri txiki-ko uholdeak eta arazoak besterik ez ziren sortu bi probintzia horietan, eta egunaren azken orduetan egoera bere onera etortzen ari zela esan zuen Jaurlaritzak.

Ipar Euskal Herrian ere bide eta pentze franko urez estali ziren. Ziburuko Larzabal kolegioa hetsi behar izan zuten goizean. Uraren heina baino apalagoa dago eraikina. Urtarriletik bigarren aldia da hetsi behar dutela ikastetxea. Joan den irai-

Ibaien eta urtegien egoera

⊗ Ibai eta errekek gainezka egin duen herriak

⊗ Plubimetria zentruak



ITURRIA: Ebroko Ur Konfederazioa, Loiu, Foronda, Noain, Miarritze eta Hondarribiako aireportuak.

J. APEZTEGIA

letik, seigarrena. Ez zen, haatik, ez behar larririk gertatu.

Atzo arratsean, 18.30ak aldera, marea gora heldu zela, Baionako Errobi aldeko bideetatik auto aparkatuak kentzeko entzun zitezkeen boz goragailuekin. Izan ere, Errobi, Urdazuri eta Uhaizandi erreken bazterrak hunki zituen bereziki aro txarrak. Hala, Itsasun, Behaskanen, Urdiñarbe, Uztaritzeko bide zenbait itxi zituzten goizean. Arratsaldeko 15.00etako, haatik, berriz jausten hasi ziren errekek. Bidarrain, Baiona eta Donibane Garaziren arteko bide nagusian, lubiziak bidera erori ziren. Azken hiru hilabete hauetan bigarren aldia da gunehorretan bide nagusia trabatua dela. Bidea itxi zuten, noiznahi beste lur zati bat erortzen ahal zelakoan. Bart, Atturri ibaian uraren heina oso goiti zen, eta gainezka egingo zuelako beldurrez ziren larrialdi zerbitzuak.

GASTEIZ

Uholdeen zain hiriko iparraldean

Gasteizko iparraldeko Betoño eta Gamarrako industrialdeetan uholdeak espero zituzten atzo, gauez, lerrook idazteko orduan, Zadorra ibaiak gainezka egin zuelako. «Uholdeak izango dira Betoñun eta Gamarran», ziurtatu zuen Alfonso Alonso alkateak, arratsaldean egindako premiazko agerraldian. Baina ura hiriburuko auzoetara ailegatzea «zaila» zela erantsi zuen. «Egoera larria» zela ez zuen ezkutatu, Uribarri Ganboako urtegitik Gasteizera bitarteko lurralde gehienak urez gainezka baitzeuden. Izan ere, alkateak prentsaurrekoa ematean urtegia betetzeko soilik sei zentimetro falta ziren.

Egoera larrituz joan zen atzo, ordurik ordu, Uribarri Ganboan. Astelehenetik astearterako gauean segundoko 25 metro kubo ur husten aritu baziren, eurijesak ekarri zuen atzo goizean 60 hustu behar izatea. Arratsaldeko 18:00ak pasatxo, ordea, 90 metro kubo ur husten ari zen; baina pare bat ordu igarota, 120 botatzen ari zen. Alabaina, urtegia betetz gero, agintarien aurreikuspena zen 200 metro kubikoko ur hustu beharko zirela. Izan ere, atzo, tarte batzuetan segundoko 300 metro kubo ur sartzen ari ziren urtegitara, eta kopuru horren herena baino gutxiago ateratzen zen.